




ଧାନଫୁଲ

(ଜାଣିଆ-କରମ ଗିତ)

* ଟିମ୍ପାୟିଆ *

ମକର୍ତ୍ତମଦତ୍ତ ଗ୍ରାହାତତ୍ତ (ବିମ୍ବିଆର)



ଧାବଧୁଳା

(ଜାଉଁଶ-ବରମ୍ବ ଗିତ)

~ ଛିମିଆଁଇଁଆ ~

ଅବତୀର୍ଣ୍ଣମୟ ମାହାତ୍ମ୍ୟ (ବିଞ୍ଚିଆର)

~ ନିଧାନ ~

ମଃ ବଃ ବୁଢ଼ିଆଲି ଏକାଢ଼ିଆ

ধানফুল

DHANFUL

(A Book on Jawa-Karam Git)

By

Shaktipada Mahato (Bansriar)

Edition I (2023)

▪ **Published by**

‘West Bengal Kudmali Academy’ Publication

Vill.- Hetjari, P.O.- Uperjari, P.S.- Arsha, Dist.- Purulia,
PIN 723201

▪ **ISBN : 978-81-963081-0-0**

▪ **Copyright © authors**

▪ **Printed by**

Sarada Press

Vill.- Hetjari, P.O.- Uperjari, P.S.- Arsha, Dist.- Purulia,
PIN 723201

▪ **Cover & Layout Designed By Manohar Mahato**

▪ **Price : Rs- 80.00 (Eighty only)**

~ উছুওন ~

বাপেক সঁউরনে



সুকদেব মাহাতঅ (বঁসরিআর)

জনম : ইঁগ-১২/৪/১৯৫৩

মরনঃ ইঁগ-১৬/৫/২০২২, চাঁদঅবার

~ মনেক কথা ~

এক আখঅড়েক জ সাড়াটি কতেক জে পুরখেইন হেকেইক, ইটা অকর
গাতেক গড়হনেই বুঝাইক। এহে অড় জ সাড়াটি লেই বনলাহেইক জিবন,
জাউআ, জউআ, জুআন, জইবুন, জিনগানি নিঅর আরঅ ঢেইরে সাড়া।
কুড়মালি চারিক একটা মুল পরব হেলেইক করম পরব আর করম পরব
মানেই জাউআ সাড়াটা চলি আউএইক। এহে করম পরবে গিতে, নাচে-
ডেগে গহঅগহাই গটা কুড়মালি মুলুক। ভাদঅরেক আদর মাখি গিত গাহা,
নাচা, করমতি আর পরবতিরাক হুবেঁ ডুবল মনে খেলি বুলেই রেগেক লহর।
করম পরবেক সিরজন কবে হেলাহেইক, ইকথাটা বাচিক করি কেহু
কহেলাই পারত নিহি, তবে এহে পরবেক হাজার হাজার গিত মুঁহেঁ মুঁহেঁ
এরিআক পেরিআ বাঁচি আহেইক। জে গিতগিলাকে হামরা
পুরখেইন/পুরখইত/পুরখেনি গিত কইহউক। খনেক সঁগেঁ তাল মিলাই গিত
সিরজন হেতে আহেইক।

হালেক কবিরিআ জাউআ, করমগিত সিরজঅহত। পুরখেইন গিতেক
সঁগেঁ হালেক সিরজল গিতগিলাউ চলেহেইক তাল মিলাই।
হালেক কবি সকতিপদঅ মাহাতঅ (বঁসরিআর) আপন সিরজল জাউআ,
করমগিতগিলা এক সঁগেঁ গাঁথি ধানফুল নাম দেই পঁথি করি সমাজেক হাঁথেঁ
দেউএক কসঅনিটাকে মঁই অরাকে সাবাইস দেইহন। পঁথিটাক সভে গিতে
আহেইক কুড়মালি সমাজ জিবনেক সুনদর, সুঘড় কথা। কবি সকতিপদক
লেখঅনি ধঁচঅর দসর কবি লে ভিনু টঁগেক সআদ দেইন। এহে ধানফুল
পঁথিটা নিছু কুড়মালি সমাজ নহেইক, সাহিতপেমি সভেকাকর ঠিনে মাইন
পাউতেইক, ইটাই মর পুরা পততুক আহি। বড়ি রিঝেক বানার, কুড়মালি
ভাখিক দমগর কবি সকতিপদঅ মাহাতঅ (বঁসরিআর) জাউআ, করম,
করম- ভাদরিআ গিত লেখি পঁথি ছাপাইকুন কুড়মালি সাহিত ভাঁড়ারকে
ফুলেঁ ফরেঁ ঝবরাউএক কসনি করলা। হামরা আসা রাখব কবিক লেখঅনি
চলতে রহউক- আর বাড়তে রহউক কুড়মালি সাহিতেক ভাঁড়ার।
জহার।

কিরিটি মাহাতঅ

সঁজুএতা

মুলকি কুড়মালি ভাখি বাইসি

~ টুমে টুমে ~

কুড়মালি চারিক একটা মূল পরব হেলেইক করম পরব। আর করম পরব
মানেই হেলেইক গিতেক সঁগেঁ সঁগেঁ নাচ, ডাঁইড় ধরি পাঁতাসারি নাচ। এহে
রিত চলি আউএহেইক পিড়হিক পিড়হি এরিআক পেরিআ। করম পরবেক
রিবেক হাউআই গাঁউ ঘারেক বহু, বেটি, মাই, জেঠি, কাকি, দিদি, বহিন
আদি করি সভেকাই জখন গিত গাহি গাহি নাচত তখন মনটা হরঅখোঁ ভরি
জাই। ই কথাটা কাকরঅ অজান নেইখন জে, জাউআ, করমগিত
সিরজঅনেক আগদহলি হেকত কুড়মালি সমাজেক মেহেরারু,
বেটিছউআরা। অরাক ঠিনেই গিতেক রেগ, টং, ধঁচঅর দেখিসুনি মন রিঝাই
উঠে লাগলি। আর অহে রেগে, ডেগে ভিজল মনে পাউল জাউআ,
করমগিত লেখেক অড়া। আস জাগলি লেখল গিতগিলাক একটা পঁথি
ছাপাই হেতেইক। মেনেক আইজ কাইল করি করি কইটা বছর বিতি
গেলেইক। এখন তড়িক জতেক জাউআ, করমগিত লেখলাই সভেগিলা
সমটিকুন এহে পঁথিটা ধানফুল নাম দেই নিখরান করহঁ। জাউআ করম
গিতেক এহে পঁথিটাই দমে নিঅর রেগেক গিত আহেইক, আর একুকটা
রেগেক কনঅটাই তিনটা, কনঅটাই চাইরটা, পাঁচটা গিত দেল আহেইক।
জাউআ, করম গিতেক সঁগেঁ আহেইক করম-ভাদরিআ রেগেক গিতাকইটা
গিতেঁ হিচছা করিএ ভনিতা নিহি দেলাহেঁই। পঁথিটা ছাপি নিখরান করেইতে
চেইর-চেইর লকেক ঠিনলে সাউতা পাউলাই অখরাক রিন জিনগানিভর
হিআই গঁথল রহতি। আর সেহঅ খাতির অখরাকে মই হিআখালাসেঁ জহার
করেইহন। একটা ঘর করে গেলে জেসন হরেক নিঅর গুনেক লকেক
দরকার রাখেইক, ঠিক তেসনে একটা পঁথি ছাপেইতে হরেক নিঅর গুনেক
লকেক দরকার রাখেইক। সভেকাকর নাম কথা দাই হেলউ মর এহে
ধানফুল জাউআ করমগিতেক পঁথিটা ছাপেইতে সভেখনে পাসেঁ
পাউলাহেঁই, ডেগে ডেগে সাউতা দেলাহাত আর অহে সঁগেঁ পঁথিটাক
আখড় বিছঅনেক কামটাউ করলাহাত সেহঅ সমভুদা (সমভুনাথ

মাহাত্ম 'বঁসরিআৰ', হেঁটজাড়ি), অখৰাক বিন কবউ সধেলাই পাৰম নিহি।
কুড়মালি ভাখি চাৰি পছড়ইআ অহে সঁগেঁ নামজাইজকা বুগইরা হামৰ
কিৰিটিদাই (কিৰিটি মাহাত্ম, ৰামকিৰসনঅপুৰ) অখৰা ধানফুল পঁথিটাই
মনেক কথা লেখিকুন পঁথিটাক মান বাড়হাই মকে অখৰাকঠিন চিৰঅৰিনি
কৰি ৰাখলা।

পঁথিটা ছাপেক আপাতাৰ লেই চিৰঅৰিনি কৰলা সারনা পেরেস,
পুৰুইলা। মৰ গিতগিলাকে সাজাই গুছিআই, সুঘড় কৰি পঁথিক ৰূপ
দেউএক খাতিৰ সারনা পেরেসেক সভে কামিআৰাকে মৰ হিআখালাসেঁ
জহাৰ ৰহলি। পঁথিটাক মলাট সাজানে আপাতাৰ লেঅল মনোহৰ মাহাত্ম
বিন মৰ হিআই গঁথল ৰহলি।

সউব লে মুড়ানে একটা কথা নি কহলেই নিহি জে, এহে
ধানফুল পঁথিটা সাহিতপেমি, গাহুক, গাহঅনি, পড়হুআ আদি কৰি
সভেকাকৰ ঠিন আদঅৰেঁ মাইন পাউলে মৰ খাটালি পসাতি এহে আস
ৰাখঅহঁ। জহাৰ।

কবি

সকতিপদঅ মাহাত্ম (বঁসরিআৰ)

আদিগুরু বুড়হাবাপ, জহার মাহামাই
গড়লাগঁ হে ঠাকুর, করমঅ গুঁসাই॥
জাহিরখানে জাহিরবুড়হি, গাঁউ গরামমাই
সসটিমাই গড় কর, মুঁড় গউ নআই॥
গাছপালহা পাহাড় নদি, জতেক বসমতাই
সভেকে করিঅন গড়, ভকঅতি হিআই॥
মাই মসি গুরুজন, জতেক আখঅড়াই
সকতিকে না নাগা করা, গড়েকর ধুরাই॥

জাউআ উঠাউএলাই জাইএক খনে গিত

সভে সঁগঅতিআ করঅমঅ পরবতিআ
জাউআ উঠাউএ চালা জাব,
চালা জাব লউ॥
বাঁসেকেরি ডালিআ ভরি নদিক বালিআ
সেহঅ ডালিই জাউআ রে উঠাব,
উঠাব লউ॥
সেঁউরি করমঅ রাই সাজঅবঅ জাউআকর মাই
সেহঅ জাউআই আখঅড়া সাজাব,
সাজাব লউ॥
করঅমে সকঅতি ধরি ধরঅমে করঅমঅ করি
জিনগানিক দিঅরা জরাব,
জরাব লউ॥

জাউআ উঠা গিত

নাউআ নাউআ ডালি
ভরাই নদিক বালি
উঠাউঅব জাউআ, হ্বে নাচি খেলি॥
দনাই দনাই ভততি
মুগ কলাই কুতথি
বুট জনহাইর রমহা, দানা আরঅ জাতি॥
হরইদ বাঁটল গরি
মাখাই জতঅন করি
জাউআ হামর ছউআ, লেবেই করাই ধরি॥
করঅমেকর সঁগেঁ
গাবি রিঝে রঁগেঁ
কহতঅ সকতিঁই, বাঁচব আপন টঁগেঁ॥

নাউআ ডালিঁই বালি ভরি
দিলা মাজি সুথর করি
ইঅ গউ, সেহঅ রে ডালিঁই,
সেহঅ ডালিঁই জাউআ রে উঠাউ॥
কুরঅথি মুগ কলাই বিহন
বুট জনহাইর রমহা রে মন
ইঅ গউ, হরইদ রে মাখাই,
হরইদ মাখাই বুন্ একঅ ধেআন॥

বাগাল জাউআ, বন জাউআ
সাঁচি জাউআ মাচি জাউআ
ইঅ গউ, গরাম রে জাউআ,
গরাম জাউআ অকঅরে সৈঁউরন॥
সনাক রুঁগেঁ জাউআ মর
হেতি রে বড়ি সুনদর
ইঅ গউ, মাইঅ রে রুপেঁ,
মাইঅ রুপেঁ করঅবঅ পালঅন॥

দিআ জরা গিত

লেখ লেহ করমরাজা লেহ দিআ বাতি,
আইজ, তর সঁগেঁ রিঝেঁ রুঁগেঁ জাগব গটে রাতি॥
নাচব খেলব গিত গাহব তর গুনে মাতি,
পাঁতাধরি ডাইড বেড়হি করমঅ পরবতি॥
ভাদরমাসেক গারঅ চাঁদেঁ আনঅলঁ নেউঅতি,
আখঅড়া মাঝেঁ ডাইর তরেঁ করঅলে বসঅতি॥
আরদাস রহঅলি হামর রহঅলি বিনঅতি,
সকতিঁই কহেই তর গড়েঁ দেবে দিলামতি॥

তাঁগ ধিতাঁগ তাঁগ ধিতাঁগ
মাদঅরি বাজইএ,
সুনা আখঅড়াই,
চালা ননদ জাব নাচেলাই ।
করম আখঅড়াই॥

ভাদঅরে আদঅরে মন
উঠঅলি রিঝাই,
ধরি রাখা দাই,
পাঁখি লেখে দেলা জে উড়াই ।
ধরি রাখা দাই॥

ইজতিআ মাখি রাতি
জেসন সভা পাই,
দেখা বাহারাই,
করমে মন ধরঅলি আঁকড়াই ।
দেখা বাহারাই॥

রুনুঝুনু গড়ে নেপুর
খঁপাই ফুলা ডাইর,
আপন চারিআই,
সকতিপদঅ আহে জে ভেদাই ।
আপন চারিআই॥

মুচুক মুচুক ঝিঁগাফুল
রিঝাল ভাদরমাস
এ হউ দেঅরা,
করমে নইহরেক জাগেই আস ।
এ হউ দেঅরা॥
সঁগি সঁগে রিঝে রঁগে

নাচঅনে পিআস
এ হউ দেঅরা,
আঁচরাহিঁ উড়াইকে উসাস ।

এ হউ দেঅরা॥
লেগেলাই আউঅতঅ দাদা
আহি জে বিসুআস
এ হউ দেঅরা,
করমে ভরমেক মাখি বাস ।

এ হউ দেঅরা॥
পালঅব করম একাদসি
রহবঅ উপাস
এ হউ দেঅরা,
সকতিঁই কহেই জিবনেকর চাস ।

এ হউ দেঅরা॥

ঝিঁগাফুলেক হ্লুক বুলুক গেঁদাফুলেক বন
এ লউ বহিনি, জাউআফুলে জুড়াই জে জিবন ॥
পদদঅফুলেক মধুক হাঁসি - বেরা জতেক খন
এ লউ বহিনি, কনে বুঝেই কাললাফুলেক মন॥
সিমফুলাই দিলা ভুলাই ছিরিআই বরন
এ লউ বহিনি, চাঁপাফুলা খঁপাকর সাজন ॥
কাস কাঁসি রুপে ভাঁসি কাপাসেক উড়অন
এ লউ বহিনি, সকতিঁই কহেই মাঁই মাটিক ধন ॥

মুচঅকে ইজতিআ রাতি
হরঅখে ভিজইএ ছাতি
অ-রে করমঅ নাচে,
করম নাচে ডুবি গেলি মন ॥

মাদঅরি ধমঅসা বাজে
দেখা রে আখঅড়া মাঝে
অ-রে জাগি রে গেলা,
জাগি গেলা নিদিআ জিবন ॥

দিদিআ বহিনিআ
সঁগঅতি গতনিআ
অ-রে পাঁতা রে সারি,
পাঁতাসারি নাচনঅ কুদন ॥

আখঅড়াই করমঅ ডারি
দিঅরা জেসঅনে চারি
অ-রে জাউআ রে ডালি,
জাউআ ডালি সকতিকেরি ধন ॥

ফিঁগফুটা ইজতিআ হরখলঅ মন,
নাচিলে-খেলিলে সাধেকর করম ॥ (তরা)

ঝিঁগাফুলা ফুটঅলি হরইদঅ বরন,
সাঁচিলে সাঁচিলে ধরম করম ॥ (তরা)

ঢলঅ ধমঅসা মাদইর বাজন,
সাজিলে সাজিলে চারি ভরম ॥ (তরা)

গিত রেগে তালে ভিজাই জিবন,
বুঝিলে সুঝিলে সকতিক মরম (তরা)

খঁপা বাঁধি দে মাই গউ, কাজঅর পিঁধাই দে
করমনাচে জাম হামে, নেপুর পিঁধাই দে ॥
সাড়ি পিঁধাই দে মাই গউ, বুলা পিঁধাই দে
আঁকঅস করিকে মাই গউ, কমর মোটি দে ॥
ডালি আনি দে মাই গউ দানা আনি দে
জাউআ বুনবঅ হামে, নেতি সুঝাই দে ॥
গিত সিখাই দে মাই গউ, রিত বুঝাই দে
সকতিঁই কহেই, ধরম করম ডহর দেখাই দে ॥

ঝিরিঝিরি ঝাননা বহি চলি জাই
কাঁহা জনমঅ ঝাননাক কাঁহা জে মিলাই॥
ঝিরিঝিরি ঝাননা বহি চলি জাই
ডুংরিই জনমঅ ভালা- সাগরেন্ মিলাই ॥
গাছেক ফুটল ফুলা- মালা জে গাঁথাই
মাই কঁখেন্ জনম বেটিক- সঁইআঁক ঘার বসাই ॥
ভাইএক লাগি বাপেক টিঁঢ়া- বহিনি বিদাই
সকতি রে এহে রিতি এরিআক পেরিআই ॥

সিরিসিরি হাউআ মনউআ খেলাই
চালা হউ ভউজি পানি আনেলাই॥
ডাঁড়িআ ঝাঁটি ভউজি চঁগরাই চঁগরাই
পানিআ আনঅবঅ ঘেইলা ভরাই॥
রাঁধি বাঁটি জাবে ভউজি মকে ডাকেলাই,
ননদ ভাজ জাব হামরা ঘাঁস কাটেলাই॥
সিখাই দিহা গিত ভউজি করম নাচেলাই,
সকতি রে ভালঅ মঁদঅ করঅমেক হিললাই॥

পাহাড় নিঅর করম পরব আউঅলি লইজকাই,
লেগে নেহি আউএই ভউজিক, আদরেকর ভাই ॥
চুরুক চুরুক ঠুটকু বাড়হিন- নাচেই আঁগনাই,
চুলহাসারেঁ কাঁদেই ভউজি ধুঁগাক বাহানাই ॥
ঝাঁক ছাড়ি পুই লতটা ভুঁইএঁ রে লতাই,
মন নেহি ভরেই ভউজিক কাকরঅ কথাই ॥
ফুঁদেক চাঁদটি ভালি ভালি- মরেই ছটপটাই,
ভিতরি মাইর সহণ্ড জানেই, কহেই সকতিটাই ॥

* * * *

ভাদরমাসে কাপাস রুআ উড়অলি রে-
উড়অলি রে,
(আর) করমেকর হ্বে মন ভরঅলি রে ॥

গাহব গিতা নাচব করম দিলা খলি রে-
দিলা খলি রে,
(আর) সাঁগিজড়ি পাঁতা সারি কলি কলি রে ॥

মুচুক মুচুক হাঁসইএ মর জাউআ ডালি রে-
জাউআ ডালি রে,
(আর) সিরিসিরি বহেই হাউআ ভালি ভালি রে ॥

করম হাউআ গাতে গাতে লাগঅলি রে-
লাগঅলি রে,
(আর) সকতিপদক মনে রিঝ জাগঅলি রে ॥

দাদৌই হামর ছলি দেলেইক- আখড়া-রে

করম নাচেলাই,

মৌইএঁ কিনি দেলি ডালা

জাউআ বুনেলাই ॥

আদর করি দুধুমৌইএঁ সিখাই দেলি রে

গিত গাহেলাই,

দুধুবাপেক মুঁহেক মধু

লারঁ ভুলেলাই ॥

বুনব জাউআ গাহব গিতা- নাচব করম রে

দেহিআ ডলাই,

আউআ লউ সঁগতি সভে

ডেগে ডেগ মিলাই/রেগে রেগ মিলাই ॥

বছরদিনেক করম পরব, ভিজাই দিলা রে

রিঝাই উঠেলাই,

সকতিঁই কহেই জিবন ডহর

করমেক হিললাই॥

ভাদরমাসেঁ করমপরব, উদকি উঠেই ছাতি-

গউ মনেক সখে,

করম নাচব রিঝে মাতি,

গউ মনেক সখে ॥

পুজবঅ করমঅ রাজা, জরি দিআ বাতি-

গউ বনঅফুলেঁ,

হালা হালা মালা গাঁথি,

গউ বনঅফুলেঁ ॥

ফুলেঁ ফরেঁ সাজেই গাছা, ইজতিআই রাতি-

গউ জাউআ ডালিই

সাজেই করমঅ পরবতি,

গউ জাউআ ডালিই॥

বছরদিনেক পরব দিদি- মনে রাখা গাঁথি-

গউ কহেই সকতি,

ভাখি চারিই ডুবাই মতি,

গউ কহেই সকতি ॥

মকে বিহা দেলে দাদা, নদি পারেক দেসেঁ

করমঅ খেলে,

দাদা, আনে জাবে কেসে,

করমঅ খেলে॥

ডহরঅ টেকতউ নদিই, বইরিনি ভেসেঁ-

গউ কেসে করি,

দাদা, জাবে হামর দেসেঁ

গউ কেসে করি ॥

সসুরঘারেঁ বহিনিআ, কাঁদতউ তর আসেঁ

গউ সেহঅ দুখা,

দাদা, ভুলঅবে তঁই কেসে,

গউ সেহঅ দুখা॥

ছললঅ আখঅড়া তর, ভরি জাতউ ঘাঁসেঁ

গউ সকতিই কহেই,

বহিনিকর হাইনিকাসেঁ,

গউ সকতিই কহেই ॥

ঢলঅ মাদঅরি বাজেই, বাজেই রে নাগঅড়া
গউ করম নাচে,
মাতি গেলেইক জে আখঅড়া,
গউ করম নাচে॥
আউআ লউ সঁগতি সভে, নাচঅব পাঁতাধরা,
গউ রেগে ডেগে,
হামরা উড়াই দেবেইক ধুরা,
গউ রেগে ডেগে॥
মর করম ভাইএক ধরম, জিবনেকর গড়া
গউ সঁচি দেখা,
গঁথল সাঁচা নেগাচারা,
গউ সঁচি দেখা॥
লকে লকে গহঅগহঅ- রিঝে দিলা ভরা
গউ এসন দিনে,
সকতি ভাগি অরাসরা,
গউ এসন দিনে ॥

করমঅ আখঅড়াই দিদি, জরেইক দিআবাতি
লউ নাচি খেলি,
হামরা জাগব গটে রাতি,
লউ নাচি খেলি ॥
ঢলঅ ধমঅসা বাজেই, উদকি উঠেই ছাতি
লউ সঁগি জুড়ি,
সভে রিঝে মাতামাতি,
লউ সঁগি জুড়ি॥

গাছ নাচেই, পাত নাচেই, নাচেই ফুলা জাতি
লউ আরঅ নাচেই,
হামরাক জনমভুঁই বসমতি,
লউ আরঅ নাচেই ॥
জাউআ ডালুঁই করেই আলা,, আলা জে পরবতি
লউ এসন দিনে,
রিঝে সরঅসপঅ সকতি,
লউ এসন দিনে ॥

করমঅ পরবে দাদা, লেগে নি আউঅলে রে-
ভাদর গটে,
পিঠিআ বহিনি কাঁদাউলে রে,
ভাদর গটে ॥
রহলঁ নইহরেক আস, কাঁটা ঘড়ি দেলে রে
কিআ দসেঁ,
দাদা, বহিনি বিসরলে রে
কিআ দসেঁ॥

লরে বহি গেলি নদি, কথা জে সুনাইলে রে
সসুর ঘারেঁ,
মকে ছটঅ জে করঅলে,
সসুরঘারেঁ॥

কতেক খাইএতেলঁ দাদা, কতেক ধন বাঁচাউলে রে-
পরব তিহার,
সকতি কাহে নিঠুর হেলে রে,
পরব তিহার ॥

* কনঅ বাটেঁ আউঅইএ করম গুসাঁই গউ

কনঅ বাটেঁ,

আউএই ভউজিকর ভাই গউ,

কনঅ বাটেঁ ॥

* কুলহি বাটেঁ আউঅইএ করম গুসাঁই গউ

বাড়িবাটেঁ,

আউএই ভউজিকর ভাই গউ ॥

* কিআ লাইএ আউঅইএ করম গুসাঁই গউ

কিআ লাইএ,

আউএই ভউজিকর ভাই গউ,

কিআ লাইএ ॥

* পরব লাইএ আউঅইএ করম গুসাঁই গউ

বহিন লাইএ,

আউএই ভউজিকর ভাই গউ,

বহিন লাইএ ॥

সকতিপদঁই কহেই তবে, রিঝে মাতাই গউ

রেগে ডেগে,

বাঁচব মধুক নাতাই গউ

রেগে ডেগে ॥

মুঁহ চরা দেঅরা ভেঠর ভেসুর গউ
সইআঁ হামর,
বড়ি বেলাজ ডিগর গউ
সইআঁ হামর॥
খরল মুড়হি সাসবুড়হি খাঁখড়ি সসুর গউ
ননদ হামর,
দিদি তিতকি নিঅর গউ
ননদ হামর॥
জেঠানি হেঁইড়সারেক রানি লুসুরঅ পুসুর গউ
কাপাড় হামর,
জেসন ঘাটেকর পাখর গউ
কাপাড় হামর॥
এসন ঘারেঁ বিহা মর কিনা জে কসুর গউ
দেখি হামর
সকতি গিরেই দুখেঁ লর গউ
দেখি হামর॥

ফুলা লড়ে জাব চালা- ফুলেকা বন,
সুনা সিলিরা লউ॥
ডালা ভরি তড়বঅ- নানা জাতি ফুল,
সুনা সিলিরা লউ॥
ডাঁইর ধরি নাচবঅ- সাধেক করম,
সুনা সিলিরা লউ॥
নউআ ডালাঁই বুনবঅ- জাউআ সনাধন,
সুনা সিলিরা লউ॥

দিআ জরি পুজবঅ- করমঅ রাজন,
সুনা সিলিরা লউ॥
হবে ডুবি নাচবএ- সকতিকর মন
সুনা সিলিরা লউ ॥

ফুটি গেলা ঝিঁগা ফুল
রিঝে দিলা বেআকুল
দিদি লউ- করম পরব ঘারা দুআরাই ॥

আউআ সভে ধরাধরি
নাচব খেলব পাঁতাসারি
দিদি লউ, গাঁথি লিহা ফুলেকেরি হাইর ॥

একাদসি করম রতি
জরি দিআ জাগর বাতি
দিদি লউ- পুজব করম গাড়ি করম ডাইর ॥

রসিকাকর কান খাড়া
মাদইরে তঅ দেলা সাড়া
দিদি লউ- সকতিটা বড়ি রিঝুআইড় ॥

ভাদরমাসে করম পরব রিবে ভরল ছাতি গউ
ডাইরধরি পাতাসারি- নাচত বহু বেটি গউ ॥

করম ডাইর গাড়ি দেলা নাইআ মাহামতি গউ
পুজতঅ করমঅ রাজা- সভে জে পরবতি গউ ॥

গিতে রেগে গহঅ গহঅ- জরেইক দিআ বাতি গউ
ধুরা উড়ি জাই দেখা, আখঅড়াকর মাটি গউ ॥

করম পরব হামর গরব- মান ভরম খাঁটি গউ
দাঁজি ভাঁজি সকতিপদঁই, কহেই খুঁটিনাটি গউ ॥

* * * * *

তাঁগ ধিতাঁগ, তাঁগ ধিতাঁগ বাজইএ মাদঅরি লউ আউআ লউ
সঁগঅতি, করম, নাচব পাতা ধরি লউ ॥
খঁপাই গাঁজি বন-ফুলা ফুলেকর হাইর করি লউ,
ইঁধনে পিঁধনে সাজা করমঅ কুঁঅরি লউ ॥

গহঅ গহঅ আখঅড়া হুবেকর গহারি লউ,
ফুলেঁ ফরেঁ ভভঅকাল হামরিকা চারি লউ ॥

বহুর দিনেক করম পরব- সভেকার পিঅরি লউ,
সকতিপদঅ হুঁদঅরঁদঅ রিবেক দিআ জরি লউ ॥

পিআইজ বনাউ কুচি কুচি,অভাব জে রসুনে লউ,
ননদ হামর রাগাই আহি,বধাউবেই কেসঅনে লউ॥
ডুভা ভততি ভাত দেলেই,ডুভি ভততি সাগ লউ,
তাউ পিটরি তেলাইমুঁহিক,ধআই নিহি রাগ লউ॥
পুটুর পুটুর বাখান পাড়েই,ভিতর ঘারে বসি লউ,
কআই ঠঁঠেইক জনহাইর বাড়ি,মকে করেই দসি লউ॥
জাঁই নঅ বহিন সুনি আউএঁ,কিনা আহেইক মনে লউ,
মুরাদ হেলে পুরাব আসা,সকতিকর ধনে লউ॥

ভাদরমাসেঁ জনহাইর লেটঅ, দনাই দনাই খাব লউ
তাউ হামরা করমনাচে আখড়া মাতাব লউ॥
নাচব খেলব গিত গাহব,সাঁগিজড়িক ডাব লউ
আপন ভাখি চারিক রুঁগেঁ মনকে গাবাব লউ॥
জিবন মানাই রিঝ রুঁগ,ভাভেক সঁগেঁ ভাব লউ
মুঁ বাঁধিকে ফরকি রহাই,আহেইক কিনা লাভ লউ॥
বছরদিনেক করমপরব,ভুলি নিহি জাব লউ
সকতিঁই কহেই মিলিমেসি জিনগানি বিতাব লউ॥

মাছ ধরে গেলে দেঅরা
আইলে সুধা হাঁথ হউ,
কেথিক সঁগে এবেইর হামে
বাঁটি দেবন ভাত হউ ॥
মাছেক আসেঁ রাঁধ নিহি
দসরা তিঅন হউ,
ভাত ঢরকাই বসি আঁহ
বকঅলি জেইসন হউ ॥

সাস-সসুর আদি করি
আউতা খাইএক আসেঁ হউ,
বিন তিঅনে ভাত দেঅরা
মুহাঁই দেবেইন কেসে হউ ॥
সকতিঁই কহেই মুনগাসাগ
আনিহা টনকাই হউ,
মাড় মেসাই রসুন দেইকে
দিহা জে ছনকাই হউ ॥

* * * * *

ভাদরমাসেক গারঅ চাঁদে- করমেকা দিনে
ভাইএক হাঁথেঁ ধরমসুতা বাঁধেই জে বহিনে ॥
করমঅ পরবতি বহিন-সুথর ইজর মনে
ভাইএক লাগি মাগেই আসিস, করমরাজাক ঠিনে॥
ভাই বহিনেক মধুক নাতা অমঅরি বাঁধঅনে,
পেরিআনি রহেক বাঁচি, রকতেকর টানে ॥
জরেই দিআ নাচেই হিআ, সকতিঁই ভাবেই মনে,
সভে কিছু হেউএক দেখা, করমরাজাক গুনে ॥

মাঁইএঁ বাপে বিহা দেলা
ধনিঘার দেখি গউ (২)
একডাঁটি মাড়েক লাগি মর রেকি রেকি॥

সাসেক হাঁথে কুলুপখাটি
ননদ দেখাই সৌখি গউ (২)
মুঁহজারা সঁইআঁ হামর, অরাক পসল পঁখি ॥

তেল সাবন ইঁধন পিঁধন
খজলে উঠত কঁথি গউ (২)
জরিপড়ি দেহিআ মর, খেতে লাগল বাঁথি ॥

লরেঁঝারেঁ বিতেই দিনা
দুখেঁ রাখল ছেঁকি গউ (২)
সকতিঁই কহেই কাপাড়টাকে, কাঁহা দেবসিক ফেঁকি ॥

ঝিঁগাফুলা ঝিঁগাফুলা
হরইদঅ বরন (২)
তর লেখে কই হেলেইক, ননদিকর মন ॥

অহরে পহরে সাঁতাই
মারেই জিবন (২)
মুঁহেঁ ফুটেই বাজড়া খই, খাপইরঅ জেসন ॥

তকে দেখি রে ফুলা
বিসরই বেদন (২)
ননদ দেখি রে ফুলা বরসই জলন ॥

তর দিলা মধু মাখা
সভে জে আপন (২)
সকতিপদঁই কহেই কাথা, ননদিক কারন ॥

ধাদকিফুল ধাদকিফুল
ফুটেই লালে লাল গউ (২)
উচিত কথাই বড়অ বহুক, লাগেইক বড়ি ঝাল ॥

নিহি চিনহেই সসুর ভেসুর
মুটা তাতল ফার গউ(২)
খাইকুনে ধউএই নিহি, নিজেক সঁখড়ি থার ॥

গহাইল গবর বাঢ়াসঢ়াই
ফুলাই রাখেই গাল গউ(২)
কারিঝুরিক ডরেন্ ভউজি, ঢুকেই নি হেইড়সার ॥

কখাই কখাই নইহর গরব
খাইএক নিছু তাল গউ (২)
সকতিপদঁই কহেই কথা, এসন বহু কাল ॥

* * * * *

হামরাকর বড়অ ভউজি
কামচরনিক ঢাইড় গউ(২)
মুহেঁ তঅ খরঅমুহিঁই, দেতউ নিহি পাইড় ॥
কামেক লেইএ কুটুস কাটাস
হেলাহেইক জে নাইড় গউ(২)
দাদাক বলে মুখড় বহুই, পাউঅলাহেইক ছাইড় ॥
এতেক দিনউ চিনহেই নিহি
খেতি গঠ টাইড় গউ(২)
কবুহুঁ নি লেলেইক হাঁথে, সঁগসারেকর চাইড় ॥

দিনে দিনে মানে মানে
দেহেইনা রগেক বাইড় গউ(২)
সকতিঁই কহেই ভিনু খাইএক, গজালেইক আবাইড় ॥

বাপে হামর কিনি দেলাক, ডালিআ রে
জাউআ বুনেলাই,
দাদাই ছলি দেইল আখঅড়া করম নাচেলাই ॥
দুধুমাঁইএঁ রেগে টুমে সুঝাঅলি রে
গিত গাহেলাই,
ডেগে চাইলে জাউআ করম ডাইর বেঢ়েলাই ॥
মাঁইএঁ দেলি ধরমগুনে করমবাতি রে
জরাউএলাই,
নেগাচারেঁ সারেভারেঁ করম পুজেলাই ॥
বহুর বছর করমপরব ভাদরমাসেঁ রে
ধরম সঁচেলাই,
সকতিঁই কহেই মধুক নাতাই, মন গঁছেলাই ॥

গহঅ গহঅ আখঅড়া
বাজেইক মাদঅরি,
নাচব খেলবঅ করম, পাঁতা ধরি ॥
জাউআ লেইএ আউআ
করম কুঁঅরি,
জাগব করমঅ রাতি, দিঅরা জরি ॥
সিরিসিরি হাউআ
রেগেক লহঅরি,

ইজতিআ ভিজলরাতি, দিলা পিঅরি ॥

আপন ভাখি চারি

জতঅনঅ করি,

জগাই রাখবঅ সকতি,হিঅরা ভরি ॥

* * * * *

কিআ লাইএ রে বঁখা

ই ডাইর উ ডাইর রে,(২)

কিআ লাইএ রে বঁখা

পখঅরিকা ধাইর ?

খঁধা লাইএ রে বঁখা

ই ডাইর উ ডাইর রে,(২)

আহার লাইএ রে বঁখা

পখঅরিকা ধাইর ॥

কিআ কিআ খাইএ বঁখা

টঁড়হউআ ভরাই রে,(২)

কিআ ডরৈ রে বঁখা

উড়িকুন পারাই ?

বেঁগা মাছা খাইএ বঁখা

টঁড়হউআ ভরাই রে,(২)

সকতিই কহেই, ফাভদ দেখি

উড়িকুন পারাই ॥

ঝুঁড় কাটি চটাই মাটি

ডাঁগাই বহাই সত,

কুডমিকর হাঁথে গঢ়ল

সনাকর ভারত ॥

টঁড়হা ভরল চাসবাস
থাহিআ বসত,
দেখাউলাহাত সমাজ জিবন
করমেক মহত ॥
মাই মাটিক ভালবাসা
কুড়মিই জানত,
দাঁজি ভাঁজি পরকিতিকে
ডহরে চলত ॥
কুড়মি কবিলা মাহান
জগতে জানত,
কুড়মি মাইএক ছউআ সকতি
ফুটিকে কহত॥

* * * * *

কাকঅরা ঘারেঁ ভালা
পঁঠিমাছেক ঝর,
কাকঅরা ঘারেঁ ভালা
ছেঁগ গর-গর-গর ?
বড় দাদাক ঘারেঁ ভালা
পঁঠিমাছেক ঝর,
ছুটু দাদাক ঘারেঁ ভালা
ছেঁগ গর-গর-গর ॥
কনে খাউঅইএ ভালা
পঁঠিমাছেক ঝর,
কনে খাউঅইএ ভালা
ছেঁগ গর-গর-গর ?
বড়অদাদাঁই খাউঅইএ ভালা

পাঁঠিমাছেক বার,
ছুটদাদাই খাউঅইএ ভালা
ছেঁগ গর-গর-গর ॥
বড়অ ঘারেঁ সুরূপ সুরূপ
সআদেক লহর,
সকতিঁই কহেই, ছটঅ ঘারেঁ
খসরঅ খসর ॥

কাঁহাইঁ বাজইএ রূপাকর নেপুরউআ
ইঅগউ- কাঁহা জে বাজেই,
কাঁহা বাজেই দাদাকর মাদইর ॥
গড়েইঁ বাজইএ রূপাকর নেপুরউআ
ইঅগউ- আখঅড়াঁই রে বাজেই,
আখঅড়াঁই বাজেই দাদাকর মাদইর ॥
কেসন কেসন বাজইএ, গড়েকর নেপুরউআ
ইঅগউ- কেসন কেসন বাজেই,
কেসন বাজেই দাদাকর মাদইর ॥
রুনুঝুনু বাজইএ গড়েকর নেপুরউআ
ইঅগউ- ধিতাঁগ ধিতাঁগ বাজেই,
ধিতাঁগ বাজেই দাদাকর মাদইর ॥
কনঅ ধনি নাচইএ মাঝঅ আখঅড়াঁই জে
ইঅগউ- কনঅ রে ধনি,
কনঅ ধনি রহলঅ হেঁইড়সার॥

হামে ধনি নাচতঅ মাঝঅ আখঅড়াই জে
ইঅগউ- ভউজি রে ধনি,
সকতিই কহেই, রহলঅ হেইড়সার॥

* * * * *

করম খেলব ভাদরমাসেঁ
রহেঁহেলঁ নইহর আসেঁ
ইঅগউ-পখইর ঘাটেঁ,
দাদাক মুহেঁ মাইএকর খভইর॥

বাটে না সঁসরইএ গড়
লরেঁ আঁখি ঝরঅঝর
ইঅগউ- মাইএকর সগেঁ,
ফুঁফুআই উঠঅলি দিলা মর ॥

জেহঅ মাইএঁ জনম দেলি
ছতক দুধাই মানসাঅলি
ইঅগউ- সেহঅ রে মাইএক,
বিদাই বেরি না দেখলেই মুঁ ॥

মুললি মাইএক নইহর অড়
দুরুন দেসে বিহা মর
ইঅগউ- কহেই সকতি,
জাই মাইএক তেল খইরঅ নাহাই ॥

কনে খজইএ ভালা- টসঅরেকা পাঁখউআ,
ইঅগউ-কনে জে খজেই,
কনে জে খজেই চাঁপাফুল ॥

দেঅরাঁই খজইএ ভালা- টসঅরেকা পাঁখউআ,
ইঅগউ- ননঅদেঁ খজঅইএ ,
ননঅদেঁ খজঅইএ চাঁপাফুল ॥

কাঁহাঁ গঁজতঅ ভালা- টসঅরেকা পাঁখউআ,
ইঅগউ -কাঁহাঁ রে গঁজতঅ,
কাঁহাঁ রে গঁজতঅ চাঁপাফুল ॥

পঁখিআঁই গঁজতঅ সকতি- টসঅরেকা পাঁখউআ,
ইঅগউ- খঁপাঁই রে গঁজতঅ,
খঁপাঁই রে গঁজতঅ চাঁপাফুল ॥

ভউজিঃ ফুটঅলি ফুটঅলি কাস
জাগঅলি নইহরেক আস
করম খেলে জাম দেউরা, নইহর আপন ভাদরমাসেঁ ॥
দেউরাঃ বরিসাঁই ধরলঅ সান
কাঁসাইএঁ পড়লঅ বান
কইসে জাবেহে ভউজি, নইহর তহর ভাদরমাসেঁ?
ভউজিঃ ভরল বানে উঁগা ভাঁসাই
হেলকিকে পার হেঅউম কাঁসাই
ভইআ হামর আউতাক জে লেগে দেউরা, ভাদরমাসেঁ ॥

দেউরাঃ ভাদঅরে বহিনেক আদর
লুটালুটি জনহাইর গাদর
সকতিপদঁই দেখেই ঘুরিফেরি আহা ভাদরমাসেঁ ॥

হরইদ রাঁগঅল ধরম সুতা বাঁধবঅ রে
দাদাক বাঁহিআই,
করম পরব দিনা ধরল, ভাদর মহিনাই॥

দাদা হামর জিঅতঅ, দুধাভাতেঁ রে
গুনেকর আলাঁই,
এহে আসরা ভরল জে মর করঅমেক ডালাঁই ॥

ভাই বহিনেক মধুক নাতা, সুথঅরা রে
এহে বসমতাঁই,
জুগেঁ জুগেঁ গাঁথাই আহেইক এরিআক পেরিআই ॥

ভাইএক সুখে বহিন সুখি, বহিন সুখে রে
ভাই জে গনাই,
সকতিঁই কহেই, জানি রহা জনাই জনাই ॥

ভাদরমাসেঁ নইহর আসেঁ
দিনা বিতি জাই,
কবে আউঅবে মরঅ ভাইরে, মকে লেগেলাই ॥

ভালি ডহর- গনি পহর
দীলা ফুঁফুআই,
আঁখি লরেন্ বানঅ খেলি জাই রে, কাজরঅ ধআই ॥
করম পরব নইহর গরব
আহি জে গঁথাই,
সাসেন্ ননদেন্ এঁগিঠাই রে হাই, কথাই কথাই ॥

সাধেক বহিন- ইঠিন উঠিন
কথাকর জালাঁই,
সকতিঁই কহেই, করম খেলে ভাই রে, আই জে লালহাঁই ॥

জিবনঅ জিনগানিআ
নদিআকর পানিআ
নাচি লে বহিনিআ, বহি জাই জে দিনউআ ॥

বরিসাঁই বানউআ
সুখলঅ নিরনউআ
রিবো রঁগে ডুবাই রাখেন্, দেহিআ মন ধনউআ ॥

ফুলে সভেই বনউআ
হরখ রাঁগল মনউআ
ধনঅ জইবন কহা, ধরি রাখেই কনউআ ॥

ভাভি আর গনিআ
ডলাউআ গউ বেনিআ
সকতিপদক মনেক কথা, সুনৈ রে বহিনিআ ॥

কেসন বহু আনলেসিক দাদা মর,
ঘারেক কামে দেখাই নি মনঘন ॥

কখাঁই কখাঁই দেখাই নিছু, মুহেঁক জর
পড়াই ঝরাই রাঁধেই রে তিঅন ॥

খাইএক খনে নুড়েই রে পসর পসর,
নইহরেকর গরব রে হরখন ॥

কইদিন বাদে নাচতউ জে মুড়েক উপর,
সকতিই কহেই না করলে সাসন ॥

কাকর কাঁধে সাজেই ভালা মাদঅরি,
কাকর গড়েঁ সাজেই রে নেপুর ?

দাদাক কাঁধে সাজেই ভালা মাদঅরি,
হামর গড়েঁ সাজেই রে নেপুর ॥

কেইসন কেইসন বাজেই ভালো মাদঅরি,
কেইসন কেইসন বাজেই রে নেপুর ?

ধাতুন তুনা বাজেই ভালো মাদঅরি,
রুনুনু বাজেই রে নেপুর ॥

নাচে গিতে আখঅড়া তঅ মাতি গেইল,
সকতিই কহেই, ভেসুরা ধুর ধুর ॥

গেরহত বিরহিবাড়ি নউতন বেহাই লউ।
বাড়িহেঁটে বিরহি লতে গিরলা বাক্বাই লউ ॥

কাদা মাটিই থেরেথেপে পিঁধনা গাবাই লউ।
বাঘলাজা বেহাই ঢুকি দেলা জে ডভাই লউ ॥

মেচাইল পঁঠিমাছ বহিন, বিলাতি মেসাই লউ।
রাঁধিবাঁটি বসি আঁহ, বেহাইএক আসাই লউ ॥

দেখিসুনি বানার দেলা সকতি খুড়াই লউ।
একটা খুঁট পিঁধি বেহাই, একটা উড়াই লউ ॥

সইআঁ গেলা হার জতে পখঅরি আগাড লউ।
ছটঅ দেঅর বাঁধি কমর, লেসইএ পাঘাড লউ ॥

থেরেথেপে কামেক মাঝেঁ বেসিআমেক চাঁড় লউ।
ভিজল কাঠেক সৈংসৈংগি, কখন ডবকেক মাড় লউ ॥

আহি একটি টুরকি ননদ- পিসনাহিক ঝাড় লউ।
ফুটল ফুলাউ তড়েই নিহি, জালাই মারেই হাড় লউ ॥
বেসিআমেক ডেরি হেলে বাখানেক পাহাড় লউ।
সকতিঁই কহেই, কাকর মুঁটা, দেবসিক তঁই আড় লউ ॥

সাস বাদি সসুর বাদি, সইআঁ হেলা পর লউ।
মাইএঁ বাপে বিহা দেলা সইতিনি উপর লউ ॥
দসেঁ বিনা দসেঁ লিআই, অহর পহর লউ।
ঘারেক কথা ঘারেই রাখঁ, করঁ নিহি সর লউ ॥
মাছ মাস তিঅন হেলে অরাকর বতর লউ।
হামর লাইএ মুঁ-মচকা কুলাই নিহি ঝর লউ ॥
ছতি ভরল দুখ হামর, আঁখি ভরল লর লউ।
সকতিঁই কহেই, কেসে জানঅম কন করঅমেক ফর লউ ॥

করম পরব ছেঁকাছেঁকি, উদকাই পুদকাই লউ
রিঝকাই আউঅলঅ হামরাক ভউজিকর ভাই লউ ॥
নইহর টানে ভউজিক মন, গেলেইক উজাই লউ
কিনা করম কিনা নিহি, গিরেই অজবঝাই লউ ॥

সটর বটর সাজে লাগেই, নচাঁই খঁচাঁই লউ
গড়েকর নেপুরা ডালা, পিঁধেইক ঘেঁচাঁই লউ॥
চইখেক কাজর অঁঠে লেসেই, বিছিআ সিঁথাই লউ
বৌহিক বাজুবৌহি আরঅ গড়েঁ জে গতাই লউ॥
বটল মাঁড় কুঁড়িই ঢারি, মাগেইন বিদাই লউ,
ই ঘার উ ঘার ঢুকিঢাকি আঁগনা রিঠাই লউ॥
থারি বিখরেতে ভউজিক, হাঁথ লে ফেঁকাই লউ,
দেখিসুনি সকতিকর, হাঁসি নি টেকাই লউ॥

লে বেটি খাতা পাঁথি জাঁই বেটি পড়হেঁ গউ
লেখাপড়হা সিখেঁ বেটি জিনগানি গড়হেঁ গউ॥
লেখাপড়হা জিএক গড়া খেআল রাখিস মুড়েঁ গউ
গাছেকর জিনগানি বেটি মাটি জেসন ফেড়েঁ গউ॥
সিকখা ছাড়া আঁধার জিবন সিকল বাঁধল গড়েঁ গউ
চইখঅ রহেইতে বেটি বাটঅ টমঅড়ে গউ॥
মুকখু জিবন ঠঁকাই মরঅত ঠেসঅ বজঅড়েঁ গউ
সকতিপদঁই গাহেই গিত গিআনেকর অড়েঁ গউ॥

কনঅ বনেক কাঠ বেটি, কনঅ বনেক লতা গউ
কনঅ ফুলাহিঁ বেটি বাঁধঅলে খঁপাঁ গউ॥
বড়অ বনেক কাঠ মাঁই গউ, ছটঅ বনেক লতা গউ
চাঁপা জে ফুলেঁ মাঁই গউ, বাঁধঅলঁ খঁপাঁ গউ॥
কেইসন কেইসন কাঠ বেটি, কেইসনঅ লতা গউ
কেইসন কেইসন ফুলা বেটি, বাঁধঅলে খঁপাঁ গউ॥

সুখল সুখল কাঠ মাই গউ, চিমড়অলঅ লতা গউ
মহঅমহঅ ফুলা মাই গউ, বাঁধঅলঁ খঁপাঁ গউ॥

কেথিক লাগি কাঠ বেটি, কেথিক লাগি লতা গউ
কেথিক লাগি ফুলা বেটি বাঁধঅলে খঁপাঁ গউ॥

রাঁধেক লাগি কাঠ মাই গউ, বাঁধেক লাগি লতা গউ
সাজন লাগি ফুলা মাই গউ, বাঁধঅলঁ খঁপাঁ গউ॥

ইঁচলিমাছেক চড়চড়ি
পঁঠিমাছেক ঝর হউ
ছটে দেঅর,
সআদ লুলুহা উপর হউ
ছটে দেঅর ॥

চাখিচুখি ছটে ননদ
বাহার-ভিতর হউ
ছটে দেঅর,
জহেই লুপচেক বতর হউ
ছটে দেঅর ॥

ইঁচলি সুঁঘা পঁঠি তিতা
নামে কাহে ডর হউ
ছটে দেঅর,
রাঁধেক হাঁথটা হামর হউ
ছটে দেঅর ॥

সকতিপদঁই কাকর মুহেঁ
সুনি এ খভর হউ
ছটে দেঅর,
লভে লহর চহর হউ
ছটে দেঅর ॥

* * * * *

আউলঅ ভাদরঅ মাস
ফুটলঅ কাস গউ
মনে হামর,
জাগল নইহরেক আস গউ
মনে হামর ॥

লুব্বক লুব্বক আউঅতঅ
করম পরব গউ
হিআ মাঝেঁ,
নাচেই নইহর গরব গউ
হিআ মাঝেঁ॥

সঁগি সঁগেঁ রিঝে রঁগেঁ
করম খেলব গউ
ডারি তরেঁ,
সুখেক দিআ জরব গউ,
ডারি তরেঁ ॥

আপন ভাখি চারি ধন
জগাই রাখব গউ
পরেক কথাঁই,
সকতি কাহে বিসরব গউ,
পরেক কথাঁই॥

হবঅকি ডবঅকি কাঁসাই বানে খেলি জাই
ভইআ রহলঅ টেকাই
নইহর-জাম কেসে গউ-হামে করম খেলেলাই ॥

লহরে লহরে পানি অকাল বরিসাই
দেখি দিলা ফুঁফুআই,
ভাঙঁ কিনা করম গউ- করম আউঅলি লইজকাই ॥

দিনা গনি ভালি ভালি- আঁখিআ বুরুআই
বান কবে জে জিজাই,
রিঝল ভিজল পরান গউ- হামর দুখোঁ লরুআই ॥

পেটে ভুখা মুঁহ সুখা আহাৰ নি রুচাই
দেখি কহেই সকতিআই,
উগাই বান পাইরাই হউ-ভউজি আউঅতঅ তর ভাই ॥

জাগা হউ কুড়মি তরা,না রহা নিদাই
জাগি উঠা সভেকাই
আপন ভাখি-চারি হউ-ধরম ভরম বাঁচাইলাই ॥
কাঁদহন জে সমাজমাই, ফুঁফুআই ফুঁফুআই
লরে ছাতি বহি জাই,
কাহে ডুবি আইহা হউ - তরা খেআলঅ হেজাই ॥

পৰব তিহাৰ নেগাচাৰ,রাখিহা জগাই
দেখি এৰিআক পেরিআই,
কৰম বাদনা টুসু হউ-জিবন ডহৰ জে দেখাই ॥
সমাজ নামে সমাজ কামে-আউআ আগুআই
কেহু না রহা পেছুআই,
কহেই সকতিপদঁই গউ-বাঁচা মুঁড়উআ উঠাই ॥

দাদা হামর रहे हेलक- आउएहेलक परब-तिहारें।
आइज हामर नाई रे दादा-लरेंबरें भाँसँ ससुरघारें ॥

কৰম বাদনা টুসু পৰব-ঘুরি আউএই বছরें বছরें।
সাধেকর नईहर हामर, हेराई गेलि दुखेकर आँधारें ॥

माँई बापेक बिछड़ बेदन-भूलअरहँ दादाकर आदरें।
सेहअ दादाँई-हिआ काँदाई,भाँसाई देलक दुखेक समुनदरें ॥

পৰব তিহাৰ কাঁদেই দিলা- অউ গউ দিদি, দাদাক বিছড় ভারें।
মর निअर जनमदुखनि,दसरअ आर नेखे जे सँगसारें ॥

* * * * *

খঁপা বাঁধি দে নঅ গউ মাই, দে মাই গউ কাজঅরা পিঁধাই।
করম পরব হেলেইক বাসি-এবেইর বেটি হেতউ জে বিদাই ॥

করমরাজা চলি গেলাক-গেলাক চলি কাঁসাই নদিক পার।
করম ডারি ভাঁসি গেলি-বেটিআ তর জাতউ সসুরঘার ॥

সাসেক দেঅল সারেভারেঁ-জরাউলঁ মাই করমঅ বাতিআ।
তরি দেঅল সারেভারেঁ-অউ গউ অ মাই, পুজবঅ জিতিআ ॥

আসিস চুমাঁই বিদাই গউ মাই-অউ গউ অ মাই
করম ধরম সাঁচি।
সকতিপদঁই কহেই কথা, অউ গউ অ মাই মনেক আঁধা পাঁছি ॥

দেঅর-ভউজি

রিমিঝিমি পানিআ লহরে লহর
কেইসে চলবঅ ডহর
টসরেকা সাড়ি মর-কাদাকেরি ডর
কেইসে চলবঅ ডহর ?

ছাতা ধরবঅ হামে তহরি দেঅর
ভউজি মনে কাহে ডর,
পগড়ি বিছাইএ দেবঁ বাটেকর উপর
ভউজি মনে কাহে ডর ॥

সিরিসিরি কালহা হাউআ কাঁপেই দেহি মর
দেঅরা পালহাকে নিঅর
জাড়া ভেদি গেলে গাতে-বেজারেকা ভর,
কেইসে চলবঅ ডহর ?

অড়হাইএ জে দেবঁ ভউজি, দহরি চাদর
সুনে বাতউআ হামর,
কাঁধেকর গমঅছি আড়েঁ-চলঅবে ডহর
সুনে বাতউআ হামর ॥

মেঘঅ আঁধারি দেঅরা ,চলেই নি নজর
কেইসে চলঅবঅ ডহর,
পিছলি গিরঅলে ভাঁগি জাতি জে হাড়গড়,
কেইসে চলঅবঅ ডহর ?

ভরিসা রাখেঁ হউ ভউজি-হামঅরি উপর
দিলা করিকে সুথর,
হাঁখেঁ ধরি লেলে জাবঁ, ঠানন সকতিকর,
দিলা করিকে সুথর ॥

ভাদরঅ মাসে ভালা জাগলঅ কাসবন রে
করমেকা রিঝে, ভিজঅলি হামর মন রে ॥
সরাবনে ভরল বানে-কাঁসাই জেইসন রে
উদকলি হিআ, নি মানইএ বাঁধন রে ॥
সঁগি সঁগে রিঝে রঁগে নাচনঅ কুদন রে
ভাদরে আদরেঁ-করঅমেকা জিবন রে ॥

পুজবঅ করমরাজা-দেইএ মনঅ ধন রে
সকতিকর কথা, এ চারিআ আপন রে ॥

সিঁথিঅহি সিঁদুরা নাই
কুঁঅরি উমইরে মাই
বেটা দেখি জুড়াই জে জিবন।
বেটি কনে দেলউ, তকে করাই বেটা ধন ।
বেটি কনে দেলউ॥
তেলঅ হরঅদি মাখাই
সিঁদুরা কাজঅরা পিঁধাই
সাধেক বেটাক লালন-পালন।
বেটি কনে দেলউ.....॥
একি কাঁখে জাউআ ডালি
দসর কাঁখে বেটা করি
করমরাজা করঅলে পুজন।
বেটি কনে দেলউ.....॥
করাক বেটা দান করি
চিলহঅ সিআরি সৈঁউরি
সকতিঁই কহেই, পাননা বাসি অন।
বেটি কনে দেলউ.....॥

ফুড়কি ছাতিক তিঅন রাঁধি
মুঁহ হেলেইক বাঁধাবাঁধি
কম দেখি আপনঅ ভাগেঁ।

দিদি ছটে ননদ,
মুঁ-টা ফুলাই লেলেইক রাগেঁ ।
দিদি ছটে ননদ ॥
দাঁতে দাঁত কুটি কুটি
খাইএক ছাড়ি গেলি উঠি
ঘারলে বাহারালি একে ডেগে ।
দিদি ছটে ননদ.....॥

মাই বেটিক ফাসার ফুসুর
হামর মুঁড়ে জতি কসুর
হেঁইড়কা ভাঁগঅলা হড়কা ডাঁগেঁ।
দিদি ছটে ননদ.....॥

রাতিঁই নিহি রাঁধাবাঁটা-
ভুখেঁ সুতল নিঠাকাঠা
কাহে সকতি গেলে তিঅন মাগে।
দিদি ছটে ননদ.....॥

নইহরেঁ বাপেক অধিন
সসুরঘারেঁ সইআঁক বাঁধিন
বনঅ মাঝেঁ কাঁদেই বনঅলতা।
গউ কনে বুঝেই,
হাইরে,বেটিছউআক বেথা।
গউ কনে বুঝেই॥
আপন জনম টিঁড়হা ছাড়ি

পৰেক টিড়হাঁই সিঁকড় গাডি
জড়ে হেউএইন সঁগসারেক নাতা।
গউ কনে বুঝেই.....॥
জাখরা হেউএ লারঅত মাই
দিসা উসা জাইন গুমাই
জিবঅনেকর সাধ সউআদ বিথা।
গউ কনে বুঝেই.....॥

নিহি পাউলে লহা সিঁদুর
চাইরঅ বাটে দেখঅত ধুঁধুর
সুনে হেউএইক কতেক মঁদঅ কথা।
গউ কনে বুঝেই.....॥

সঁগসারেক ঘানি টানি
বিতেইন গটে জিনগানি
সকতিঁই কহেই,দিআকর পলিতা।
গউ কনে বুঝেই.....॥

ভাদর মাসেঁ করম পরব
রিঝেঁ ভিজঅল ছতিআ,
এ লউ সঁগঅতিআ,
নাচঅব খেলঅব করম রাতিআ॥

ডালুই ডালুই সনাক জাউআ
জরেইক জাগর বাতিআ,
এ লউ সঁগঅতিআ,
ডাইর তরেঁ পরঅবতিআ॥

করঅমে ভরঅমঅ মতি
পেনিঅসি সতিআ,
এ লউ সঁগঅতিআ,
ডাইড় ধরা গাহা গিতিআ॥

করম পরব হামর গরব
সকতিঁই কুটেই থথিআ,
এ লউ সঁগঅতিআ,
জিআই রাখব আপন রিতিআ॥

ধানফুলা কাসফুলুই সাজঅলঅ ভাদর রে,
বহঅলি করমঅ হাউআ, রিঝঅলি অনতর রে॥
জাগঅলঅ ঢলঅ ধমঅসা বাঁসিআ মাদইর রে,
ইজঅরা আকাস হাঁসেই, কাটিকে বাদইর রে॥
মুচকইএ ঝিঁগাফুলা জনহাইরেক আদর রে,
করম রেগেক হেলকঅনিই, মনউআ বিভর রে॥
সুরসুরাই গড়হাঁথ অহরঅ পহর রে,
সকতিঁই কহেই ভালেই বহুই, নইহরেক ডহর রে॥

করঅমঅ ভাদরঅ মাস
সিসিরেঁ সাজঅলঅ ঘাঁস
ইজতিআই হাঁসেই বনঅফুল গউ।
রসিকা মন রিঝেঁ বেআকুল॥
মাদঅরিক হাঁকানি সুনি
কনে রহেই লেইএ ঠুনি
হেরাই জাই আলিস বেজার ঢুল গউ।
জরিকে করমঅ বাতি
নাচব খেলব গটে রাতি
হরখ নদি উছুলঅ ডুবুল গউ।
নাচে গিতে বহাই বান
জিআই রাখব আপন মান
সকতিঁই কহেই, জিবনেকর মুল গউ।

লহঅ লহঅ ভাদঅরেঁ
করঅমেকর আদঅরেঁ
খেলেই হাউআ সিরিসিরি,
রিঝেঁ দিলা জাগঅলি হামঅরি।
নাচব করম পাঁতাধরি॥
নাউআ নাউআ ডালিআ
নদিআকর বালিআ
অঁজঅরেঁ অঁজঅরেঁ ভরি,
সাধেক জাউআ বুনব জতন করি।
সাজঅম গউ কুঁঅরি মাই
থিরাকে বেটা মানাই

পুজম করম দিআ জরি,
মাঝ আখঅড়াই গাড়াই করম ডারি।
করম রাঁগল মতিআ
রিবোঁ ভিজল ছতিআ
কেসে ভুলম আপন চারি,
সকতিপদঁই কহেই ঘুরিফেরি।

গহঅগহঅ আখঅড়া বাজইএ ঢউল নাগঅড়া
কাঁহাঁ গেলা, হামর ভাদইরা মাদইরা।
কাঁহাঁ গেলা॥
নি বাজঅলে মাদঅরি মানাই নেহি ঝুমঅরি
ডাকি আনা, কাঁহাঁ ভুলি রহল আদইরা।
ডাকি আনা॥
নুন বিনু তিঅনা (আর) মাদইর বিনু নাচঅনা
লাজোঁ বিঁধেই, মকে হেঅইতে গউ সদইরা।
লাজোঁ বিঁধেই॥
এসন সখেক রাতিআ হবোঁ ভরল ছতিআ
রসিক বিনু, সকতি লাগেইক জে গউ আধইড়া।
রসিক বিনু॥

মড়কচাঁই পানি ঝাঁকরেই, মাইবা ঘারেঁ কাদা রে
বহুক গুনে,
ভেড়া হেলাক হামর দাদা রে,
বহুক গুনে॥
বহুক কখাঁই উঠন বইঠন, জেসন ধবিক গাধা রে
বহুক নেজ়েঁ,
গুনেক দাদাক গড়হাঁথ বাঁধা রে
বহুক নেজ়েঁ॥
বহুই জদি রসুন ছেঁছেইক, দাদাঁই ছেঁছেইক আদা রে
বহুই হেলেইক এখন ধন মানেক গাদা রে
বহুই হেলেইক॥
বিহাক আগু রহেহেলাক, কতেক সিধাসাধা রে
দেখিসুনি,
সকতিক মনে লাগেই ধাঁধা রে
দেখিসুনি॥



চিসাআইআক চিত্ৰশাপ

অকতিদৈত্ৰ মাহাত্ম্য (বঁৰুৱাৰা)



বাপ- সুকদেব মাহাত্ম্য, মাই- বিনোয়ানি মাহাত্ম্য
গাঁও- চিটিডি, ডাক আৰু খানা- আড়সা, জেলা-
পুৰীয়া (গুৱাহাটী), মহাবিল নম্বৰ - ৯৭৪৯১৪৭০৫৮
চিসাআল পঁথি- ভিনসান, বিনিমি, সৌন্দৰ্য
জাগৰন গিত, বাঁকা সিঁথা বঁৰুই সৌন্দৰ্য, মাইএক
হাঁৰে বেটিক জিবন,

ছাপাই মুদ্রা- দিআ, ছট্ৰাক সুলবি
সঁগিআ সঁজুআনিই নিখৰাল পঁথি- ধঁধুৱা, জহান
কৰম, লতে লতে বিহাগিত, লতে লতে কৰম গিত,
পুৰণি সঁহুৱাই গিত, কুড়মাগি চাৰি, মাথোঁৱাই গিত

